

四庫全書

集部

欽定四庫全書

竹莊詩話卷十二

雜編二

北征

杜甫

詩眼云孫莘老嘗謂老杜北征詩勝退之南山詩王平甫以為南山勝北征終不能相服時山谷尚少乃曰若論工巧則北征不及南山若書一代之事以與國風雅頌相為表裏

則北征不可無而南山雖不作未害也二公
之論遂定

石林詩話云北征窮極筆力如太史公紀傳
此古今絕唱

嬾真子云唐外戚傳云外家之成敗視主德
之如何至哉此言也明皇之於太真極矣故
有馬嵬之事惟老杜叙此事殊為得體云不
聞夏殷衰中自誅褒妲若謂此事自出於明

皇之意與君王掩面救不得相去遠矣

皇帝二載秋閏八月初吉杜子將北征蒼忙問家室維
時遭艱虞朝野少暇日顧慚恩私被詔許歸蓬蓽拜辭
詣闕下怵惕久未出雖乏諫諍姿恐君有遺失君誠中
興主經緯固密勿東胡反未已臣甫憤所切揮涕戀行
在道途猶恍惚乾坤含瘡痍憂虞何時畢靡靡踰阡陌
人煙眇蕭瑟所遇多被傷呻吟更流血迴首鳳翔縣旌
旗晚明滅前登寒山重屢得飲馬窟邠郊入地底涇水

中蕩滴猛虎立我前蒼崖吼時裂菊垂今秋花石戴古
車轍青雲動高興幽事亦可悅山果多瑣細羅生雜橡
栗或紅如丹砂或黑如點漆雨露之所濡甘苦齊結實
緬思桃源內益歎身世拙坡陀望鄜時巖谷互出沒我
行已水濱我僕猶木末鳴臬鳴黃桑野鼠拱亂穴夜深
經戰場寒月照白骨潼關百萬師往者散何卒遂令半
秦民殘害為異物況我墮胡塵及歸盡華髮經年至茆
屋妻子衣百結慟哭松聲迴悲泉共幽咽平生所嬌兒

顏色白勝雪見爺背面啼垢膩腳不韞牀前兩小女補
綻纔過膝海圖拆波濤舊繡移曲折天吳及紫鳳顛倒
在短褐老夫情懷惡嘔泄卧數日那無囊中帛救汝寒
凜慄粉黛亦解芑衾稠稍羅列瘦妻面復光癡女頭自
櫛學母無不為曉妝随手抹移時施朱鉛狼籍畫眉濶
生還對童稚似欲忘饑渴問事競挽鬚誰能即嗔喝翻
思在賊愁甘受雜亂貼新婦且慰意生理焉得說至尊
尚蒙塵幾日休練卒仰觀天色改坐覺妖氛豁陰風西

北來慘澹隨回紇其王願助順其俗善馳突送兵五千
人驅馬一萬匹此輩少為貴四方服勇決所用皆鷹騰
破敵過箭疾聖心頗虛佇時議氣欲奪伊洛指掌收西
京不足拔官軍請深入蓄銳伺俱發此舉開青徐旋瞻
略恒碣昊天積霜露正氣有肅殺禍轉亡虜歲勢成擒
胡月胡命其能久皇綱未宜絕憶昨狼狽初事與古先
別姦臣竟蕝醢同惡隨蕩折不聞夏殷衰中自誅褒姒
周漢獲再興宣光果明哲桓桓陳將軍仗鉞奮忠烈微

爾人盡非於今國猶活淒涼大同殿寂寞白獸闥都人
望翠華佳氣向金闕園陵固有神灑掃數不缺煌煌太
宗業樹立甚宏達

南山詩

韓愈

集注云是詩凡百有二韻始總叙四時之變
次叙南山連亘之所止其末則叙其經歷之
所見焉

雪浪齋日記云讀退之南山詩頗覺似上林

子虛賦才力小者不能到

吾聞京城南茲維羣山囿東西兩際海巨細難悉究山
經及地志茫昧非受授團辭試提挈挂一念萬漏欲休
諒不能粗叙所經觀嘗昇崇邱望戢戢見相湊清明出
稜角縷脈碎分繡蒸嵐相瀕洞表裏忽通透無風自飄
簸融液煦柔茂橫雲時平凝點點露數岫天空浮修眉
濃綠畫新就孤撐有巉絕海浴褰鵬喙春陽潛沮洳濯
濯吐深秀巖巒雖偉萃輒弱類含耐夏炎百木盛蔭鬱

增埋覆神靈日歔歔雲氣爭結構秋霜喜刻轢磔卓立
癰瘦叅差相疊重剛耿陵宇宙冬行雖幽墨水雪工琢
鏤新曦照危峨億丈恒高袤明昏無停態頃刻異狀候
西南雄太白突起莫間遙藩都配德運分宅占丁戊道
遙越坤位詆訐陷乾竇空虛寒兢兢風氣較搜漱朱維
方燒日陰霰縱騰糅昆明大池北去覲偶晴晝絲聯窮
俯視倒側困清漚微瀾動水面踴躍躁獠犖驚呼惜破
碎仰喜呀不仆前尋徑杜墅全蔽畢原陋崎嶇上軒昂

始得觀覽富行行將遂窮嶺陸煩互走勃然思圻裂擁
掩難恕宥巨靈與夸蛾遠賈期必售還疑造物意固護
蓄精祐力雖能排幹雷電怯呵詬攀緣脫手足蹭蹬抵
積梵茫如試矯首塢塞生怕愁威容喪蕭爽近新迷遠
舊拘官計日月欲進不可又因緣窺其湫凝湛閼陰罍
魚鰕可俯掇神物安敢寇林柯有脫葉欲墮鳥驚救爭
銜彎環飛投棄急哺轂旋歸道迴睨達枿壯復奏吁嗟
信奇恠峙質能化質前年遭譴謫探歷得邂逅初從藍

田入顧眄勞頸脰時天晦大雪淚目苦朦瞶峻塗拖長
冰直上若懸溜褰衣步推馬顛蹶退且復蒼黃忘遐睎
所矚纔左右杉篁咤滿蘓杲耀攢介冑專心憶平道脫
險逾避臭昨來逢清霽宿願欣所一作始副崢嶸躋冢頂脩
閃雜颺颺前低劃開濶爛漫堆衆皴或連若相從或蹙
若相鬪或安若弭伏或竦若驚雌或散若瓦解或赴若
輻一作輪輳或翩若船遊或決若馬驟或背若相惡或向
若相佑或亂若抽筋或嶮若注矢或錯若繪畫或繚若

篆籀或羅若星離或翁若雲逗或浮若波濤或碎若鋤

耨或如賁育倫睹勝勇前購先強勢已出後鈍嗔詎濡

上闕
下耨

或如帝王尊叢集朝賤幼雖親不褻狎雖遠不悖

謬或如臨食案肴核紛飮飪又如遊九原墳墓已椁柩

或纍若盆罌或揭若甌桓或覆若曝鼈或頽若寢獸或

蜿若藏龍或翼若搏驚或齊若友朋

一作
隨迎

或差若先後

或迸若流落或顧若宿留或戾若仇讐或密若婚媾或

儼若峨冠或翻若舞袖或屹若戰陣或圍若蒐狩或靡

然東注或偃然北首或如火焙焰或若氣饋餽或行而
不輟或遺而不收或斜而不倚或弛而不彀或赤若禿
鬣或燠若柴樵或如龜坼兆或若卦分絲或前橫若剝
或後斷若妬延延離又屬央央叛還遘喁喁魚闔萍落
落月經宿閭閭樹牆垣巉巉架庫廐參參削劍戟煥煥
銜瑩琇敷敷花披萼闐闐屋摧雷悠悠舒而安兀兀狂
以狃超超出猶奔蠹蠹駭不懋大哉立天地經紀肖營
腠厥初孰開張僂僂誰勸侑創茲朴而巧戮力忍勞疚

得非施斧斤無乃假詛咒鴻荒竟無傳功大莫酬儻嘗
聞於祠官芬苾降歆嗅斐然作歌詩惟用贊報酌

月蝕詩

盧仝

唐書云仝嘗為月蝕詩以譏切元和逆黨韓
愈稱其工

新天子即位五年歲次庚寅斗柄揅子律調黃鍾森森
萬木夜殫立寒氣顛負頑無風爛銀盤從海底出出來
照我茅屋東天色紺滑凝不流水光交貫寒腫臃初疑

白蓮花浮出龍王宮八月十五夜比並不可雙此時怪
事發有物吞食來輪如壯士斧斫壞桂似雪山風拉摧
百鍊鏡照見膽平地理寒灰火龍珠飛出腦却入蚌蛤
胎摧壞破壁眼有盡當天一搭如煤炴磨踪滅跡須臾
間便似萬古不可開不料至神物有此大狼狽星如撒
沙出爭頭事光大奴婢炷暗燈揜莢如玳瑁今夜吐燄
長如虹孔隙千道射戶外玉川子涕泗下中庭獨自行
念此日月者太陰太陽精皇天要識物日月乃化生走

天汲汲勞四體與天作眼行光明此眼不自保天公行道何由行吾見陰陽家有說望日蝕月月光滅朔月掩日日光缺兩眼不相攻此說吾不容又孔子師老子云五色令人目盲吾恐天似人好色即喪明幸且非春時萬物不嬌榮青山破瓦色綠水冰崢嶸花枯無女艷鳥死沉歌聲頑冬何所好偏使一目盲傳聞古老說蝕月蝦蟇精徑圓千里入汝腹如此癡骸阿誰生可從海窟來便解緣青冥恐是睚眦間揜塞所化成黃帝有四目

帝舜重瞳明二帝懸四目四海生光輝吾不遇二帝泥
漚不可知何故瞳子上坐受蟲豸欺長嗟白兔搗靈藥
恰似有意防姦非藥成滿臼不中度委任白兔夫何為
憶昔堯為天十日燒九州金爍水銀流玉燭丹砂焦六
合烘為窯堯心增百憂帝見堯心憂勃然發怒決洪流
立擬沃殺九日妖天高日走沃不及但見萬國赤子臍
臍生魚頭此時九御導九日爭持節幡麾幢旒駕車六
九五十四頭蛟螭虬掣電九火輶汝若蝕開齟齬輪銜

轡執索相爬鉤推蕩轟訇入汝喉紅鱗燄鳥燒口快翎
鬣倒側聲酸鄒撐腸拄肚礪硯如山丘自可飽死更不
偷不獨填饑坑亦解堯心憂恨汝時當食藏頭撒腦不
肯食不當食張脣哆嘴食不休食天之眼養逆命安得
上帝請汝劉嗚呼人養虎被虎齧天媚墓被墓瞎乃知
恩非類一一自作孽吾見患眼人必索良工訣想天不
異人愛眼固應一安得嫦娥氏來習扁鵲術手操春喉
戈去此睛上物其初猶朦朧既久如抹漆但恐功業成

便此不吐出玉川子又涕泗下心禱再拜額榻砂土中
地上蟣虱臣全告愬帝天皇臣心有鐵一寸可剗妖墓
癡腸上天不為臣立梯蹬臣血肉身無由飛上天揚天
光封詞付與小心風颭排闥闔入紫宮密邇玉几前擘
坼奏上臣全頑愚胷敢死橫干天代天謀其長東方蒼
龍角插戟尾捭風當心開明堂統領三百六十鱗蟲坐
理東方宮月蝕不救援安用東方龍南方火鳥赤潑血
項長尾短飛跋躉頭戴丹冠高達枿月蝕鳥宮十三度

鳥為居停主人不覺察貪向何人家行赤口毒舌毒蟲
頭上喫却月不啄殺虛賤鬼眼明突窩鳥罪不可雪西
方攫虎立踦踦斧為牙鑿為齒偷犧牲食封豕大蠶一
轡固當軟美見似不見是何道理爪牙根天不念天天
若准擬錯准擬北方寒龜被蛇縛藏頭入殼如入獄蛇
筋束緊束破殼寒龜夏鼈一種味且當以其肉充臃死
殼沒信處唯堪支牀脚不中鑽灼與天下卜歲星主福
德官爵奉董秦忍使黔婁生覆尸無衣巾天失眼不吊

歲星胡其仁榮惑矍鑠翁執法大不中月明無罪過不
糾蝕月蟲年年十月朝太微支盧謫罰何災凶土星與
土性相背反養福德生禍害到人頭上死破敗今夜月
蝕安可會太白真將軍怒激鋒鉞生恒州陣斬酈定進
項骨脆甚春蔓菁天唯两眼失一眼將軍何處行天兵
星辰任廷尉天律自主持人命在盆底固應樂見天旨
時天若不肯信試喚臯陶鬼一問一如今日三台大昌
宮作上天紀網環天二十八磊磊尚書郎整頓排班行

劍握他人將一肆太陽側一肆天市傍操斧代大匠兩手
不怕傷弧矢引滿反射人天狼呀啄明煌煌癡牛與騃
女不肯勤農桑徒勞含淫思旦夕遙相望虫尤簸旗弄
旬朔始槌天鼓鳴璫琅枉夫能蛇行眉目森森張天狗
下舐地流血何滂滂譎險萬萬黨構架何可當眯目饜
成就害我光明王請留北斗一星相北極指揮萬國懸
中央此外盡掃除堆積如山岡贖我父母光當時恒星
沒殞雨如迸漿似天會事發叱喝誅姦強何故中道廢

自遺今日殃善善又惡惡郭公所以亡願天神聖心無
信他人忠王川子詞訖風色緊格格近月黑暗邊有似
動劍戟須臾癡墓精兩吻自決坼初露半箇壁漸吐滿
輪魄衆星盡原赦一墓獨誅磔腹肚忽脫落依舊掛穹
碧光彩未蘊來慘淡一片白奈何萬里光受此吞吐厄
再得見天眼感荷天地力或問王川子孔子脩春秋二
百四十年月蝕盡不收今子咄咄詞頗合孔意不王川
子笑答或請聽逗遛孔子父母魯諱魯不諱周書外書

大惡故月蝕不見收予命唐天口食唐土唐禮過三唐
樂過五小猶不說大不可數災沴無有大小瘡安得引
衰周研覈其可否日分晝月分夜辨寒暑一主刑一主
德政乃舉孰為人面上一目偏可去願天完兩目照下
萬方土萬古更不瞽萬萬古更不瞽照萬古

月蝕詩效玉川子作

韓愈

學林新編云玉川子詩雖豪放然太險怪而
不循詩家法度退之乃摘其句而約之以禮

陳齊之云退之效玉川子月蝕詩乃刪盧仝
冗語耳非效玉川也韓雖法度森嚴便無盧
仝豪放之氣

元和庚寅斗插子月十四日三更中森森萬木夜僵立
寒氣鬪厲頑無風月形如白盤完完上天東忽然有物
來噉之不知是何蟲如何至神物遭此狼狽凶星如撒
沙出攢集爭強雄油燈不照席是夕吐燄如長虹玉川
子涕泗下中庭獨立念此日月者為天地之眼睛此猶

不自保吾道何由行嘗聞古老言疑是蝦蟇精經圓十
里納汝腹何處養汝百醜形爬沙脚手鈍誰使汝解緣
青冥黃帝有四目帝舜重其明今天祇兩目何故許食
使偏盲堯呼大水浸十日不惜萬國赤子魚頭生汝於
此時若食日雖食八九無噉名赤龍黑鳥燒口熱翎鬣
倒側相搪撐婪酣大肚遭一飽飢腸徹死無由鳴後時
食月罪當死天羅磕巾何處逃汝形玉川子立於庭而
言曰地行賤臣全再拜敢告上天公臣有一寸刃可剗

凶蠶腸無梯可上天天階無由有臣蹤寄牋東南風天
門西北祈風通丁寧附耳莫漏洩薄命正值飛廉慵東
方青色龍牙角何呀呀從官百餘座嚼啜煩官家月蝕
汝不知安用為龍窟天河赤烏司南方尾秃起鰭沙月
蝕於汝頭汝口開呀呀蝦蟇掠汝兩吻過忍學省事不
以汝背啄蝦蟇於菟蹲於西旗旌衛毳毼既從白帝祠
又食於蜡禮有加忍令月被惡物食枉於汝口插齒牙
烏龜怯姦怕寒縮頸以殼自遮終令夸娥扶汝出卜師

燒錐鑽灼滿板如星羅此外内外官瑣細不足科臣請
悉掃除慎勿許語令啾譁併光全耀歸我月旨眼鏡淨
無纖瑕弊蛙拘送主府官帝箸下腹嘗其膳依前使免
操杵曰玉階桂樹閒婆娑姮娥還宮室太陽有室家天
雖高耳屬地感臣亦心使知臣意雖無口言潜喻厥旨
有氣有形皆吾赤子雖忿天傷忍殺孩稚還女月明安
行于次盡釋衆罪以蛙磔死

冰柱

劉義

劉義傳云義能為歌詩作冰柱雪車二詩出
盧仝孟郊右樊宗師見為獨拜

韻語陽秋云劉義詩酷似玉川子而傳於世
者二十七篇而已冰柱雪車二詩雖作語奇
怪然議論亦皆出於正也冰柱詩云不為四
時雨徒於道路成泥粗不為九江浪徒能汨
沒天之涯雪車詩謂官家不知民餒寒盡驅
牛車盈道載玉屑載載欲何之秘藏深宮以

禦炎酷如此等句亦有補於時與玉川子月

蝕詩稍相類

師干久不息農為兵分民重嗟騷然縣宇土崩水潰畹
中無熟穀壠上無桑麻王春判序百卉茁甲含葩有客
避兵奔游僻跋履險阨至自三巴貂裘蒙茸已散縷鬢
髮蓬肥雀驚鼠伏寧遑安處獨卧旅舍無好夢更堪走
風沙天人一夜剪瑛瑤詰旦都成六出花南畝未盈尺
纖片亂舞空自紛拏旋落旋逐朝暾化簷間冰柱如削

出交加或低或昂小大瑩潔隨勢無等差始疑玉龍下
界來人世齊向茅簷布爪牙又疑漢高帝西方未斬蛇人
不識誰為當風仗莫邪鏗鏘冰有韻的皪玉無瑕不為
四時雨徒於道路成泥祖不為九江浪徒能汨沒天之
涯不為雙井水滿甌泛泛烹春茶不為中山漿清新馥
鼻盈百車不為池與沼養魚種芰成靈靈不為醴泉與
甘露使名異瑞世俗誇特稟朝澈氣潔然自許靡間其
邇遐森然氣結數千里滴瀝聲沉十萬家明也雖小暗

之大不可遮勿被曲瓦直下不能抑羣邪奈何時逼不
得時在我目中倏然漂去無餘些自是成毀任天理天
於此物豈宜有忒賒反令井蛙壁蟲變空易背人縮首
競呀呀我願天工迴造化藏之韞櫝翫之生光華

雪車

臘令凝締三十日繽紛密雪一復一孰云潤澤在枯荄
闐闐餓民凍欲死死中猶被豺狼食官軍初還城壘未
完備人家十里無煙火雞犬何太怨天不卹吾甿如何

連夜瑤花亂皎潔既同君子節沾濡多着小人面寒鏢
侯門見客稀色迷塞路行商斷小小細細如塵間輕輕
緩緩成撲簌官家不知民餒寒盡驅牛車盈道載肩玉
載載欲何之秘藏深宮以禦炎酷徒能自衛九重間豈
信車轍血點點盡是農夫哭兵刃殘喪後滿野誰為載
白骨遠戍久乏糧太倉誰為運紅粟戎夫尚逆命偏箱
鹿角誰為敵士夫困征討買花載酒誰為適天子端然
少旁求股肱耳目皆姦慝依違用事佞上方猶驅餓民

運造化防暑阨吾聞躬耕南畝舜之聖為民吞蝗唐之德未聞墮孽苦蒼生相羣相黨上下為蠱賊廟堂食祿不自慙我為斯民歎息還歎息

黃鶴樓

崔灝

該聞錄云唐崔顥題武昌黃鶴樓詩云云李白負大名尚曰眼前有景道不得崔顥題詩在上頭欲擬之較勝負乃作鳳凰臺詩

昔人已乘黃鶴去此地空餘黃鶴樓黃鶴一去不復返

白雲千載空悠悠晴川歷歷漢楊樹芳草淒淒鸚鵡洲
日暮家山何處是煙波江上使人愁

登鳳凰臺

李白

珊瑚鉤詩話云金陵鳳凰臺在城之東南四
顧江山下窺井邑古題詠惟謫仙為絕唱

鳳凰臺上鳳凰遊鳳去臺空江自流吳宮花草埋幽徑
晉國衣冠成古丘三山半落青天外二水中分白鷺洲
捭為浮雲能蔽日長安不見使人愁

古劍歌

郭元振

廣卓異記云郭元振為通泉尉前後掠所部
千餘人遺賓客百姓苦之武右使籍其家有
書數百卷令問其資財所在知皆已濟人於
是奇而免之召見大稱旨令口占古劍歌進
天后奇之命繕寫賜諸學士

君不見昆吾鐵冶飛炎煙紅光紫霧俱赫然良工鍛煉
凡幾年鑄得寶劍名龍泉龍泉顏色如霜雪良工咨嗟

嘆奇絕琉璃玉匣吐蓮花錯鏤金環生明月正逢天下
無風塵幸得周防君子身精光黯黯青蛇色文章片片
綠龜鱗非直結交游俠子亦嘗親近英雄人何言中路
遭棄捐零落飄淪古獄邊雖復沉埋無所用猶能夜夜
氣衝天

遊龍門應制作

宋之問

隋唐佳話云武后遊龍門命羣臣賦詩先成
者賜錦袍左史東方虬詩成設燕賜坐未安

宋之問詩後成文理兼美左右莫不稱善乃
就奪錦袍衣之

宿雨霽氛埃流雲度城闕河堤柳新翠苑樹花先發洛
陽花柳此時濃山水樓臺應幾重羣公拂霧朝翔鳳天
子乘春幸鑿龍鑿龍近出王城外羽從琳琅擁軒蓋雲
罕纔臨御水橋天衣已入香山會山壁巔巖斷復連清
流澄澈俯伊川塔影遙遙綠波上星龕奕奕翠微邊層
巒舊長千尋木遠壑初飛百丈泉綠仗蜺旌遶香閣下

輦登高望河洛東城宮闕擬昭回南陌溝塍殊綺錯林
下天香七寶臺山中春酒萬年杯微風一起祥花落仙
樂初鳴瑞鳥來鳥來花落紛無已稱觴獻壽煙霞裏歌
舞淹留景欲斜石關猶駐五雲車鳥旗翼翼留芳草龍
騎駸駸映晚花千乘萬騎鑾輿出水靜山空嚴警蹕郊
外喧喧引看人傾都南望屬車塵囂聲引颺聞黃道佳
氣周迴入紫宸先王定鼎山河固寶命乘周萬物新吾
君不事瑤池樂時雨來觀農扈春

修貢顧渚茶山

漁隱叢話云此詩古雅得詩人諷諫之體誠可尚也

禹貢通遠俗始圖在安人後王失其本職吏不敢陳亦有姦佞者因茲欲求伸動生千金費日使萬姓貧我來顧渚源得與茶事親黎甿輟耕農採掇實苦辛一夫且當役盡室皆同臻捫葛上歌壁蓬頭入荒榛終朝不盈掬手足皆皴鱗悲嗟徧空山草木為不春陰嶺牙未吐

使曹牒已頻心爭造化先走挺麋鹿均選納無日夜擣
聲昏繫晨衆工何枯櫨俯視彌傷神皇帝尚巡狩東郊
路多堙周迴繞天涯所獻惟艱勤況減兵草用兼茲困
疲民未知供億餘誰合分此珍顧省忝邦守有慚復因
循茫茫滄海間丹憤何由申

題破山寺後禪院

常建

洪駒甫詩話云丹陽殷播撰河嶽英靈集首
列常建詩愛其山光悅鳥性潭影空人心之

句以為警策歐公又愛建竹徑通幽處禪房
花木深欲效建作數語竟不能得以為恨予
謂此詩全篇皆工不獨此兩聯而已

清晨入古寺初日照高林竹徑通幽處禪房花木深山
光悅鳥性潭影空人心萬籟此都寂但餘鐘磬音

竹莊詩話卷十二

欽定四庫全書

集部

竹莊詩話卷十三至十五

詳校官監察御史_臣劉人睿

主事銜_臣徐以坤覆勘

總校官知縣_臣繆琪

校對官中書_臣高 中

謄錄監生_臣李春和

欽定四庫全書

竹莊詩話卷十三

雜編三

寄杜光庭

張令問

蜀獐杞云張令問字博夫幼有巢許之節放
意林泉長於詩什與杜光庭詩云云其標致
如此

試問中朝為宰相何如林下作神仙一壺美酒一爐藥

飽聽松風白晝眠

安貧

韓偓

潘子真詩話云山谷嘗謂予言老杜雖在流落顛沛未嘗一日不在本朝故善陳時事句律精深超古作者忠義之氣激發而然韓偓貶逐後依王審知其集中所載云云其詞悽楚切而不迫不忘其君也

手風慵展八行書
眼暗休尋九局圖
窓裏日光飛野馬

紫頭筠管長蒲盧謀身拙為安蛇足報國危曾將虎鬚
舉世可能無默識未知誰擬試齊竽

醉著絕句

漁隱叢話云葛亞卿集句云萬里清江萬里
天一村桑柘一村煙漁翁醉睡又醒睡高唱
夕陽孤島邊前輩集句詩每一句取一家詩
今亞卿全用致堯前兩句極為無工又後二
句不稱前兩句豈若致堯之渾成也杜荀鶴

亦有溪興絕句云山雨溪風卷釣絲瓦甌蓬
底獨斟時睡來睡着無人喚流下前溪也不
知語句俱弱亦不若致堯之雅健也

萬里清江萬里天一村桑柘一村煙漁翁醉着無人喚
過午醒來雪滿船

贈韓思彥

賀遂亮

蔡寬夫詩話云國史補載賀遂亮贈韓思彥
詩世多傳誦之予讀大唐新語乃併得思彥

答詩其辭亦自閒雅可喜大抵唐之文盛於
開元以前故二人雖不以詩稱而終不凡也
意氣百年內平生一寸心欲交天下士未面已虛襟君
子重名義直道冠衣簪風雲行可託懷抱自然深落霞
靜霜景墜葉下疎林若上南山岸希訪北山岑

答賀遂亮

韓思彥

古人一言重嘗謂百年輕今日投歡會顧盼盡平生簪
裾非所託琴酒冀相并累日同遊處良霄款素誠霜飄

知柳脆雪冒覺松貞願言何所道幸保歲寒名

寄邊衣

裴說

山谷跋裴說寄邊衣詩云說詩句甚麗喜作
卓爾奇怪零陵總記叙述僧懷素草書載說
詩一篇尤詼詭也

深閨乍冷開香篋玉筋微微濕紅頰一陣霜風殺柳條
濃煙半夜成黃葉重重白練明如雪獨下閒階轉淒切
祇知抱杵搥秋砧不覺高樓已無月時聞塞雁聲相喚

紗窓只有燈相伴幾度齊紈又懶裁離腸恐逐金刀斷
細想儀形執牙尺回刀剪破澄江色愁捻銀針信手縫
惆悵無人試寬窄時時舉袖勻殘淚紅牋謾有千行字
書中不盡心中事一半慇懃託邊使

懷素臺歌

零陵摠記云唐開元中有僧懷素居是臺學
者因為之懷素臺今有墨池筆塚存焉裴說
有歌云云

我呼古人名鬼神側耳聽杜甫李白與懷素文星酒星
草書星永州東郭有奇怪筆塚墨池遺迹在筆塚低低
高似山墨池淺淺深如海我來恨不已怎得青天化為
一張紙高聲喚起懷素書搦管研硃點湘水欲歸家重
嘆嗟眼前有三箇字枯樹樗烏梢蛇墨老鴟

巫山神女祠

沈佺期

郡閣雅談云繁知聞樂天將過巫山先於神
女祠粉壁大書曰蘓州太守真才子行到巫

山必有詩為報高唐神女道遠排雲雨待清
詞白公見詩邀知一曰劉夢得禮白帝欲留
一詩於此怯而不敢罷郡經過悉去詩千餘
首只留四篇

巫山高不極合沓狀奇新閭谷疑風雨幽崖若鬼神月
明三峽曉潮落九江春為問陽臺客應知入夢人

前同

王無競

神女向高唐巫山下夕陽徘徊作行雨婉孌逐荆王電

影江前落雷聲峽外長霽雲無處所臺館曉蒼蒼

前同

李端白

巫山十二峯皆在碧虛中迴合雲藏日霏微雨帶風猿
聲寒渡水樹色遠連空愁向高唐去千秋見楚宮

前同

失名

巫峽見巴東迢迢出半空雲藏神女館雨到楚王宮朝
暮泉聲落寒暄樹色同清猿不可聽偏在九秋中

慈恩寺浮圖

章八元

鑑誠錄云長安慈恩寺浮圖前後題詩多矣
唐文宗朝元微之白樂天到塔下見章八元
所留詩命僧拂去塵埃二公吟咏盡日不厭
悉令除去諸家牌惟留章詩

十層突兀在虛空四十門開面面同却怪鳥飛平地上
自驚人語半天中回梯暗踏如穿洞絕頂初攀似出籠
落日鳳城佳氣合滿城香樹雨濛濛

華清宮詩

張祐

雅言雜載云張佑素以詩名而華清宮詩尤為世所稱

龍虎旌旗雨露飄鳳池歌斷玉山遙明皇上馬太真去
紅杏滿園香自銷

宮詞

杜牧之

茗溪漁隱云余閱王建宮詞選其佳者亦自少得只世所膾炙者數詞而已其間雜以他人之詞如云云此杜牧之也云云此白樂天

也云云此王昌齡也

竹坡詩話此一首杜牧之王建詩中皆有之
不知誰作也以余觀之當是建詩耳蓋二子
之詩其清婉大略相似而牧之多險側建多
平麗此詩蓋清而平者也

冷齋夜話云詩有意含蓄者如宮詞云云是
也

銀燭秋光冷畫屏輕羅小扇撲流螢天階夜色涼如水

卧看牽牛織女星

前同

白居易

淚滿羅巾夢不成
夜深前殿按歌聲
紅顏未老恩先斷
斜倚薰籠坐到明

宮怨

王昌齡

冷齋夜話云詩有句意俱含蓄者如宮怨云
云是也

奉帚平明金殿開
且將團扇暫徘徊
玉顏不及寒鴟色

猶帶昭陽日影來

宮妓

李商隱

談苑云余知制誥日與余恕同考試因出義
山詩共讀酷愛一絕擊節稱嘆曰古人措辭
寓意如此之深妙令人感慨不已

珠箔輕明拂玉墀披香新殿鬪腰支不須看盡魚龍戲
終遣君王怒偃師

桃花夫人廟

即息夫人

杜牧

許彥周詩話云僕嘗謂此詩為二十八字史

論

細腰宮裏露桃新
脈脈無言度幾春
至竟息亡緣底事
可憐金谷墜樓人

宮詞

杜牧

漁隱叢話載此詞云斷句極佳意在言外而
幽怨之情自見詩貴如此若使一覽而意盡
亦何足道哉

監宮引出暫開門隨例湏朝不是恩銀鑰却收金鎖合
月明花落又黃昏

宮詞

王建

陳輔詩話云王建宮詞荆公獨愛其云云

樹頭樹底覓殘紅一片西飛一片東自是桃花貪結子
錯教人恨五更風

宮詞

徐仲雅

西清詩話云余嘗愛長沙徐仲雅宮詞云云

其富貴瀟洒可謂兩得矣

內人曉起怯春寒
輕揭珠簾看牡丹
一把柳絲收不得
和風搭在玉欄干

傷田家

聶夷中

詩史云聶夷中河南人有詩云云
孫光憲謂有三百篇之旨

二月賣新絲
五月糶新穀
鬻得眼前瘡
剜却心頭肉
我願君王心
化作光明燭
不照綺羅筵
徧照逃亡屋

入山寄城中故人

王維

後湖集云此詩造意之妙至與造化相表裏
知其蟬蛻塵埃之中浮游萬物之表者也山
谷云頃年登山臨水未嘗不讀摩詰詩固知
此老胷次定有泉石膏肓之疾

中歲頗好道晚家南山陲興來每獨往勝事空自知行
到水窮處坐看雲起時偶然值林叟談笑無回期

六言

王維

漁隱叢話云每哦此句令人坐想輞川春日
之勝此老傲睨閒適於其間也

桃紅復含宿雨柳綠更帶朝煙花落家僮未掃鳥啼山
客猶眠

贈丘丹

裴廸

蔡寬夫詩話云王摩詰韋蘓州集載裴廸丘
丹唱和詩其語皆清麗高勝常恨不多見如
廸云云其氣格殆不減二人非唐中葉以來

嘒嘒以詩名者可比乃知古今文士湮滅不
得傳於子孫者不可勝數然士各言其志其
隱顯亦何足多較觀兩詩趣向其胸中殆非
汲汲於世者正涵無聞亦何所恨其姓名偶
見二人集亦未必不為幸也

安禪一室內左右竹亭幽有法知不染無言誰敢酬烏
飛爭向夕蟬蛻意先秋煩暑自茲退清涼何處求

和裴迪

丘丹

賣藥有時至自知來往踈遽辭池上酌新得山中書步
出芙蓉府歸乘轂駟車猥蒙招隱作豈愧班生廬

寄遠

張迥

郡閣雅談云張迥少年苦吟未有所得夢五
色雲自天而下取一團吞之遂精雅所作有
寄遠詩携謁齊已點頭吟諷無數為改虬髯
黑在無迥遂拜為一字師

錦字憑誰達閒庭草又枯夜長燈影滅天遠雁聲孤蟬

鬢凋將盡虬髯白也無幾回愁不與因看朔方圖

尋山家

長孫佐輔

苔溪漁隱云尋山家云云余嘗居村落間食
飽杖策縱步款鄰家之扉小立待之眼前景
物悉如詩中之語然後知其工也

獨訪山家歇還涉茅屋斜連隔松葉主人聞語未開門
遶籬野菊飛黃蝶

白牡丹

裴璘

秦中歲時記云長安三月五日兩街看牡丹
奔走車馬慈恩寺元果院牡丹先於諸牡丹
半月開太貞院牡丹後於諸牡丹半月開故
裴兵部璘白牡丹詩自題於慈恩佛殿東壁
上太和中車駕幸此寺見所題詩吟咏久之因
令宮嬪諷念及暮歸大內此詩滿六宮矣

長安豪貴惜春殘爭賞先開紫牡丹別有玉枝擎露冷
無人肯就月中看

牡丹

羅鄴

古今詩話云詠牡丹詩甚多羅鄴云落盡春
紅始見花花時比屋事豪奢買栽池館恐無
地看到子孫能幾家此詩中虎也

落盡春紅始著花花時比屋事豪奢買栽池館恐無地
看到子孫能幾家門倚長衢攢繡轂幄籠輕日護香霞
歌鍾滿座爭歡賞肯信流年鬢有華

早朝大明宮

賈至

苔溪漁隱曰老杜和早朝大明宮詩賈至為
唱首王維岑參皆有之四詩皆佳絕

文昌雜錄云禮部王員外因言和詩最為難
唯唐賢尤工於此賈至早朝大明宮云云王
維和云云杜甫和云云三篇皆用鳳池事唯
工部尤出於二公上建三省待漏院書此為
屏風焉

銀燭朝天紫陌長
禁城春色曉蒼蒼
千條弱柳垂青瑣

百轉流鶯繞建章
劍佩聲隨玉墀步
衣冠身惹御爐香
共沐恩波鳳池裏
朝朝染翰侍君王

同前

杜甫

五夜漏聲催曉箭
九重春色醉仙桃
旌旗日暖龍蛇動
宮殿風微燕雀高
朝罷香煙携滿袖
詩成珠玉在揮毫
欲知世掌絲綸美
池上于今有鳳毛

同前

王維

絳幘鷄人報曉籌
尚衣方進翠雲裘
九天闔闔開宮殿

萬國衣冠拜冕旒
日色纔臨仙掌動
香煙欲傍袞龍浮
朝罷須裁五色詔
佩聲歸到鳳池頭

同前

岑參

雞鳴紫陌曙光寒
鶯囀皇州春色闌
金闕曉鐘開萬戶
玉階仙仗擁千官
花迎劍珮星初落
柳拂旌旗露未乾
獨有鳳凰池上客
陽春一曲和皆難

江行無題

四首

錢起

詩史云錢起多佳篇人收起詩不過百首有

錢蒙仲得江行無題百絕皆人家藏本所無

有云云四首

霽雲疎有葉雨浪細無聲穩放扁舟去江天自有程

又

憔悴異靈均非纔作逐臣如逢漁父問未是獨醒人

又

煙渚復煙渚畫屏非畫屏引愁天末去數點暮山青

又

隄壞漏江水地坳成野塘晚荷從不折留取作秋香

山中寒思

鮑溶

詩史云歐陽文忠公酷愛鮑溶山中寒思一篇最佳云云文忠晚得恨見之遲

山深多悲風敗葉與林齊門遙非世路何人念窮棲哀
風破山起夕雪誤鳴雞巢鳥侵早出饑猿無聲啼晨興
動煙火開門伐冰溪老木寒更瘦陰雲晴亦低我負自
力求顏色常低迷時想靈臺下遊子正悽悽

贈琴棋僧

張碧

雅言系述云張瀛碧之父也官至郎曹嘗為
歌贈琴棋僧同列見之曰非其父不生其子

我嘗聽師法一說波上蓮花水中月不垢不淨是色空
無法無空亦無滅我嘗聽師禪一觀浪溢鼇頭蟾魄滿
沙河世界盡空空一寸寒灰冷燈畔我又聽師琴一撫
長松喚住秋山雨弦中雅弄若鏗金指下寒泉流太古
我又聽師碁一着山頂坐沉紅日脚阿誰稱是國手人

羅浮道士賭却鶴輸却藥法懷斟下紅霞束手不敢爭
頭角

夜坐

路洵美

雅言系述云路洵美唐相巖之元孫有夜坐
詩云云競傳於湖南

簾捲竹軒清四隣無語聲漏從吟裏轉月自坐來明草
木露華濕衣裳寒氣生難逢知鑒者空悅此時情

宮詞

杜荀鶴

幕府燕間錄云杜荀鶴詩惟宮詞為唐第一
故諺云杜詩三百首妙在一聯中風暖鳥聲
碎日高花影重是也

早被嬋娟誤欲粧臨鏡慵承恩不在貌教妾若為容風
暖鳥聲碎日高花影重年年越溪女相憶採芙蓉

玉樹曲

王穀

百斛明珠云唐末有宜春人王穀者以能詩
擅名於時嘗作玉樹曲云云此詩大播於人

口轂未第時嘗於市廛中忽見同人被無賴輩毆打轂前救之揚聲曰莫無禮識吾否吾便是解道君臣猶在醉鄉中面上已無陳日月者無賴輩聞之斂手慙謝而退

壁月夜瓊樹春蓮古冷冷詞調新當時狎客盡豐祿直諫犯顏無一人歌未闕晉王劍上粘腥血君臣猶在醉鄉中面上已無陳日月

巡內至上陽宮

竇庠

韻語陽秋云竇庠一絕云云造語可謂秀整
矣

愁雲漠漠草離離太液鈎陳處處疑薄暮毀垣春雨裏
殘花猶發萬年枝

宮詞

張祐

古今詩話云張祐有觀獵詩并宮詞白傅稱
之小杜

雲溪友議云杜牧之與祐為詩酒之交酷吟

祐宮詞為詩曰如何故國三千里虛唱宮詞
滿六宮此詩宮娥諷念思鄉起長門之愁

故國三千里深宮二十年一聲河滿子雙淚落君前

觀獵

張祐

雲溪友議云張三作觀獵詩比王右丞予則
未敢優劣

曉出禁城東分圍淺草中紅旗開向日白馬驟迎風背
手抽金鏃翻身控角弓萬人齊指處一雁落寒空

同前

王維

風勁角弓鳴將軍獵渭城
草枯鷹眼疾雪盡馬蹄輕
忽過新豐市還歸細柳營
迴看落鵬處千里暮雲平

題三閭大夫廟

武士

青瑣後集屈平廟唐末有洪州衙前軍將忘
其姓名題一絕云云自後能詩者不敢措手

蒼藤古木幾經春
舊祀祠堂小水濱
行客謾陳三酹酒
大夫元是獨醒人

效陶體

韋應物

竹坡詩話云古今詩人多喜效淵明體者如
和陶詩非不多但使淵明愧其雄麗耳韋蘓
州云云非惟語似而意亦大似蓋意到而語
隨之也

霜露悴百草而菊獨好華物性有如此寒暑其奈何擬
英泛酒醪日入會田家盡醉茅簷下一生豈在多

三月三日寄諸弟兼懷崔水部

暮節看已謝茲晨愈可惜風澹意傷春池寒花斂夕對
酒始依依懷人還的的誰當曲水行相思尋舊迹

效何水部 二首

玉宇含清露香籠散輕煙應當結塵抱難從茲夕眠

又

夕露起遙怨蟲響亂秋陰反覆相思字中有故人心

竹莊詩話卷十三

欽定四庫全書

竹莊詩話卷十四

雜編四

古意

陳羽

詩史云陳羽有詩百餘首古意一篇集中所
無

十三學綉羅衣裳自憐紅袖聞馨香人言此是嫁時服
含笑不刺雙鴛鴦郎年十九髭未生拜官天下聞郎名

車馬駢闐賀門館自然不失為公卿是時妾家猶未貧
兄弟出入雙車輪繁華全盛兩相敵與郎年少為婚姻
郎家居近御溝水豪門客盡躡珠履雕盤酒器常不乾
曉入中厨妾先起姑嫜嚴肅有規矩小娘嬌多意難取
朝參暮拜白玉堂綉衣著盡黃金縷妾貌漸衰郎漸薄
時時強笑意索寞知郎本來無歲寒幾回掩淚看花落
妾年四十絲滿頭郎未五十封公侯男兒全盛日忘舊
銀床羽帳空颼颼庭花紅遍蝴蝶飛看郎玉佩下朝時

歸來略不相顧却令侍婢生光輝郎恨婦人易衰老
妾亦恨深不忍道看郎壯健能幾時知過六十還枯槁

遊道林嶽麓寺

沈傳師

六一居士云沈傳師道林嶽麓寺詩題云酬
唐侍御姚員外而二人之詩不見不知何人
也獨此詩以字畫傳於世而詩亦自佳

詩事云黃魯直尤喜沈傳師嶽麓寺詩碑嘗
為之說曰沈傳師字畫皆道勁真楷筆勢可

學唯道林嶽麓詩殊不相類似有神助其間
架縱奪偏正肥瘦長短各有體忽若龍起滄
溟鳳翔青漢又如花開秀谷松偃幽岑或似
枯木倒懸怪石高墜千變萬態冥發天機與
其詩之氣馥往往勑敵不問阿買之徒即韓
擇木蔡有鄰不是過也此魯直不特愛其
書又愛其詩如此僕於宋次道家見所謂唐
侍御首唱詩尤豪壯乃儒林郎監察御史唐

扶也

承明年老輒自論乞得湘守東南奔為聞楚國富山水
青嶂邈迤僧家園含香珥筆皆眷舊謙抑自忘臺省尊
不令執簡候亭館直許携手遊山樊忽驚列岫曉來逼
朔雪洗盡烟嵐昏碧波回嶼三山轉丹艚繚郭千艘屯
華鑣蹀躞絢砂步大旆錯綵輝松門樛枝競驚龍蛇勢
折幹不減風霆痕相重古殿倚岩腹別引新徑縈雲根
生乎傷楚虞帝魂情多思逸聊開樽危弦細管逐歌颺

畫鼓繡靴隨節飀鏘金七言凌老杜入木八法墻高軒
嗟余絕倒久不知恐復感激論元元

嶽麓山道林二寺行

杜甫

蔡寬夫詩話云子美題道林嶽麓寺詩云宋
公放逐登臨後物色分留與老夫宋公之問
也此語句法清新故為傑出其後唐扶題詩
復云兩祠物色收拾盡壁間杜甫真少恩意
雖相反而語亦秀拔乃知文章變態初無窮

盡惟能者得之扶即沈傳師所謂唐侍御者
其詩他語亦稱如泉清或戲蛟龍窟殿豁數
盡高帆掀即令異鳥聲不斷聞道看花春更
繁之類與子美寺門高開洞庭野殿腳插入
赤沙湖五月寒風冷佛骨六時天樂朝香爐
之句幾不相上下

玉泉之南麓山殊道林林壑爭盤紆寺門高開洞庭野
殿腳插入赤沙湖五月寒風冷佛骨六時天樂朝香爐

地靈步步雪山草僧寶人人滄海珠塔劫宮牆壯麗敵
香厨松道清涼俱蓮花交響共命鳥金榜雙廻三足鳥
方丈涉海費時節元圃尋河知有無暮年且喜經行近
春日兼蒙暄暖扶飄然斑白身奚遑旁此煙霞茅可誅
桃源人家易制度橘州田土仍膏腴潭府邑中甚淳古
太守庭內不喧呼昔遭衰世皆晦迹今幸樂國養微軀
依止老宿亦未晚富貴功名焉足圖久為野客尋幽慣
細學何顥逸興孤一重一掩吾肺腑山鳥山花吾友于

宋公放逐曾題壁物色分留與老夫

遊道林嶽麓二寺

唐扶

道林嶽麓仲與昆卓肇請從先後論松根踏雪二千步
始見大屋開三門泉清或戲蛟龍窟殿豁數盡高帆掀
即今異鳥聲不斷聞道看花春更繁從容一衲分若有
蕭瑟兩鬢吾能髡逢迎侯伯轉覺貴膜拜佛像心加尊
梢揖皇英頰濃淚試與屈賈招清覓荒唐大樹悉柶桂
細碎枯草多蘭蓀沙彌去學五印字靜女來懸千尺幡

主人念我塵眼昏夜半號冷期至瞰遲回雖得上白舫
羈紲不敢言綠樽兩祠物色收拾盡壁間杜甫真少恩
晚來光彩又騰射筆鋒正健如可吞

感懷

韋莊

鑑誠錄云詩之作也窮通之分可觀王建詩
寒碎故仕終不顯李洞詩窮悴竟不仕韋莊
詩壯故仕至台輔何瓚詩愁未幾而卒王建
寄賈島曰盡日吟詩坐忍飢萬人中覓似公

稀僮眠冷榻朝猶卧驢放秋田夜不歸傍暖
旋收紅落葉覺寒猶着舊生衣曲江池畔時
時到為愛鷓鴣雨裏飛李洞上曹郎中曰閑
坊宅枕穿官水聽水分衾蓋蜀僧藥杵聲中
搗殘夢茶鐺影裏煮孤燈刑曹樹蔭千年井
華岳樓開萬里冰詩句變風官漸紫夜濤春
盡海邊藤韋莊感懷云云何璜書事云果決
生涯向洛中西投知己語從容雲遮劍閣三

千里水隔瞿塘十二峯
濶步丈翁坊裏月間
尋杜甫宅邊松到頭
須卜林泉隱自愧無能
繼卧龍蜀檣杙云韋莊
字端已乾寧中舉進士
有詩云云末兩句時人
以其有宰相器

長年方悟少年非
人道新詩勝舊詩
十畝野塘留客釣
一軒春雨對僧棋
花間醉任黃鸝語
池上吟從白鷺窺
大道不將爐冶用
有心重立太平基

陪王郎中尋孔徵君

韋應物

復齋謾錄云尋孔微君早春遊望二篇皆佳
作而韋集逸去余家有顧陶所編唐詩有云
俗吏閒居少同人會面難偶隨香署客來訪竹林歡暮
館花微落春城雨暫寒甕間聊共酌莫使宦情闌

和晉陵陸丞相早春遊望

杜審言

獨有宦遊人偏驚物候新雲霞出海曙梅柳渡江春淑
氣催黃鳥晴光照綠蘋忽聞歌古調歸思欲沾巾

高軒過

李賀

撫言云李賀年七歲以長短之製名動京華
時韓文公與皇甫湜覽賀所作奇之因連騎
造門求見賀總角荷衣而出二公不之信因
令面賦一篇賀承命欣然操觚染翰傍若無
人仍名曰高軒過二公大驚遂以所乘馬命
聯鑣而還所居親為束髮

華裾織翠青如葱金環壓轡搖玲瓏馬蹄隱耳聲隆隆
入門下馬氣如虹云是東京才子文章鉅公二十八宿

羅心胸元精照耀貫當中
殿前作賦聲摩空筆補造化
天無功龐眉書客感秋蓬
誰知死草生華風我今垂翅
附冥鴻他日不羞蛇作龍

金銅仙人辭漢歌

李賀

杜牧之序云賀探尋前事所以深歎恨古今
未嘗經道者如金銅仙人辭漢歌補梁庾肩
吾宮體謠求取情狀離絕遠去筆墨畦逕間
亦殊不能知之

梁魏錄云李賀歌造語奇特首云茂陵劉郎
秋風客指漢武帝言也又云魏官牽車指千
里此言魏明遣人遷金銅仙人於鄴也又云
空將漢月出宮門憶君清淚如鉛水此語尤
警拔非撥去筆墨畦迳安能及此

序云魏明帝青龍元年八月詔宮官牽車西取漢
孝武捧露盤仙人欲立置前殿宮官既拆盤仙人
臨載乃潛然淚下遂作歌

茂陵劉郎秋風客夜聞馬嘶曉無迹
畫欄桂樹懸秋香
三十六宮土花碧
魏官牽車指千里東關酸風射眸子
空將漢月出宮門憶君清淚如鉛水
衰蘭送客咸陽道
天若有情天亦老
攜盤獨出月荒涼
渭城已遠波聲小

還自會稽歌

李賀

序云庾肩吾於梁時嘗作宮體謠引以應和皇子
及國世淪敗肩吾先潛難會稽後始還家僕意其
必有遺文今無得焉故作還自會稽歌以補其悲

野粉椒壁黃濕螢滿梁殿臺城應教人秋衾夢銅輦吳
霜點歸鬢身與塘蒲晚脈脈辭金魚羈人守迤賤

題金山寺

張祐

南唐書云金山寺號為勝景先張祐吟詩有
僧歸夜船月龍出曉堂雲之句自後詩人閣
筆

一宿金山頂微茫水國濱僧歸夜船月龍出曉堂雲樹
影中流見鐘聲兩岸聞因悲在朝市終日醉醺醺

題華清宮

杜裳

西清詩話云世有才藻擅名而辭間不工者
有不以文藝稱而詩或驚人者近傳留題華
清宮一絕云云乃杜裳也武昌阻風一絕云
云乃方澤也此殆不可知已

行盡江東數十程曉乘殘月入華清
朝元閣上西風急
都入長楊作雨聲

武昌阻風

方澤

江上春風留客舟無窮歸思滿江流與君盡日閒臨水
貪看飛花忘却愁

晚泊潯陽望廬峯作

孟浩然

呂氏童蒙訓云孟浩然詩云云前四句但詳
看此等詩自然高遠

挂席幾千里名山都未逢泊舟潯陽郭始見香爐峯常
讀遠公傳永懷塵外蹤東林精舍在日暮空聞鐘

南州有贈二首

賈至

蔡寬夫詩話云王摩詰世固知之矣獨賈至
未見深稱者予觀其南州有贈二首云云如此
等類使置老杜集中雖明眼人恐未易辨

極浦三春草高樓萬里心楚山晴靄碧湘水暮流深忽
與朝中舊同為澤畔吟停盃試北望還欲淚沾襟

又

越井人南去湘川水不流江邊數盃酒海內一孤舟嶺
嶠同遷客京華即舊遊春心將別恨萬里共悠悠

錦瑟

李商隱

箱素雜記云義山錦瑟詩云云山谷道人讀此詩殊不曉其意後以問東坡東坡云此出古今樂志云錦瑟之為器也其絃五十其柱如之其聲也適怨清和按李詩莊生曉夢迷蝴蝶適也望帝春心託杜鵑怨也滄海月明珠有淚清也藍田日暖玉生煙和也一篇之中曲盡其意史稱其瑰奇雄邁信然

錦瑟無端五十絃一絃一柱思華年莊生曉夢迷蝴蝶
望帝春心託杜鵑滄海月明珠有淚藍田日暖玉生煙
此情可待成追憶只是當時已惘然

中秋月

廖凝

雅言雜載云廖凝字熙績善吟諷有集行於
世詠中秋月與聞蟬最為絕唱江左學詩者
競造其門

九十日秋色今朝已中分孤光吞列宿四面絕微雲衆

木排踈影寒流疊細紋遙遙望丹桂心緒正紛紛

聞蟬

一聲初應候萬木已西風偏感異鄉客先於離塞鴻日
斜金谷靜雨過石城空此處不堪聽蕭條千古同

金陵懷古

劉夢得

鑑誠錄云元微之劉夢得韋楚客會於樂天
之居因論南朝興廢事各賦金陵懷古詩夢
得方在郎省元公已居北門夢得騁其才略

無遜意滿引一觴請為首唱一揮而成白公
覽詩曰四人探驪龍吾子先得其珠其餘鱗
甲將何為三公於是罷吟

珊瑚鈎詩話云千尋鐵鎖沉江底一片降旗
出石頭當時號為絕唱

王濬樓船下益州金陵王氣黯然收千尋鐵鎖沉江底
一片降旗出石頭荒苑至今生茂草古城依舊枕寒流
而今四海歸皇化兩岸蕭蕭蘆荻秋

寄南游兄弟

寶 翠

苔溪漁隱云丙戌之冬余初病起深居簡出
終日曝背晴簷萬事不到因以荆公所選唐
百家詩反復熟味之見其格律辭句列皆相
似雖無豪放之氣而有秀整之功高為不及
卑復有餘適中而已荆公為欲觀唐人詩觀
此足矣詎不然乎集中佳句世所稱道者不
復錄出惟余別有喜者命兒輩筆之以備遺

云四絕云云

書成未報幾時還
知在三湖五嶺間
獨立衡門秋水濶
寒鴉飛去日銜山

南遊感興

竇 羣

傷心欲問前朝事
惟見江流去不回
日暮東風春草綠
鷓鴣飛上越王臺

移家別湖上亭

戎 昱

好是春風湖上亭
柳條藤蔓繫離情
黃鶯久住渾相識

欲別頻啼四五聲

宿建德江

孟浩然

移舟泊滄渚日暮客愁新野濶天低樹江清月近人

別輞川別業

王縉

苕溪漁隱云余舊見郵亭壁間題云云亦有
佳思後讀王維集乃王縉詩附在集中

山月曉仍在林風涼不絕殷勤如有情惆悵令人別

麗人行

杜甫

瑤溪集云詩之景不一而足今隨詩出之觀
作者之梗槩云瑤溪集多立體式品題諸詩
強為分別初無確論今並不取獨所論詩之
景者為說雖泛然其間編類多前輩所稱美
而後人所膾炙故頗加刪錄得五十九篇若
他有評論已見別卷者茲不復載

一首說帝都遊春之盛

三月三日天氣新長安水邊多麗人態濃意遠淑且真

肌理細膩骨肉勻
繡羅衣裳照暮春
感金孔雀銀麒麟
頭上何所有
翠微盻葉垂鬢脣
背後何所見
珠壓腰祔穩稱身
就中雲幕椒房親
賜名大國號與秦
紫駝之峰出翠釜
水精之盤行素鱗
犀筋厭飫久未下
鑿刀縷切何紛綸
黃門飛鞚不動塵
御厨絡繹送八珍
簫鼓哀吟感鬼神
賓從雜遝實要津
後來鞍馬何逡巡
當軒下馬立錦茵
楊花雪落覆白蘋
青鳥飛去銜紅巾
炙手可熱勢絕倫
慎莫近前丞相嗔

樂遊園

一首知貴遊燕會之適

樂遊古園峯森爽煙絲碧草萋萋長公子華筵勢最强
秦川對酒平如掌長生木瓢示真率更調鞍馬狂歡賞
青春波浪芙蓉園白日雷霆夾城仗閭闔晴開詆蕩蕩
曲江翠幕排銀榜拂水低徊舞袖翻緣雲清切歌聲上
却憶年年人醉時只今未醉已先悲數莖白髮那拋得
百罰深盃亦不辭聖朝亦知賤士醜一物自荷皇天慈

此身飲罷無歸處獨立蒼茫自詠詩

飲中八仙歌

一首見開元太平人物之盛

知章騎馬似乘船眼花落井水底眠汝陽三斗始朝天
道逢麴車口流涎恨不移封向酒泉左相日興費萬錢
飲如長鯨翕百川銜盃樂聖稱避賢宗之瀟洒美少年
舉觴白眼望青天皎如玉樹臨風前蘇晉長齋繡佛前
醉中往往愛逃禪李白一斗詩百篇長安市上酒家眠

天子呼來不上船，自稱臣是酒中仙。
張旭三杯草聖傳，脫帽露頂王公前。
揮毫落紙如雲烟，焦遂五斗方卓然。
高談雄辨驚四筵。

今夕行

一首見旅館博戲豪放之快

今夕何夕歲云徂，更長燭明不可孤。
咸陽客舍一事無，相與博塞為歡娛。
馮陵大叫呼五白，袒跣不肯成臠廬。
英雄有時亦如此，邂逅豈即非良圖。
君莫笑劉毅從來

布衣願家無僦石輸百萬

高都護驄馬行

三首詠駿馬見寫貌駿物可喜之狀

安西都護胡青驄聲價欵然來向東此馬臨陣久無敵
與人一心成大功功成惠養隨所致飄飄遠自流沙至
雄姿未受伏櫪恩猛氣猶思戰場利腕促蹄高如踏鐵
交河幾蹴曾冰裂五花散作雲滿身萬里方看汗流血
長安壯兒不敢騎走過掣電傾城知青絲絡頭為君老

何由却出橫門道

天育驃騎歌

吾聞天子之馬走千里今之畫圖無乃是是何意態雄
且傑駿尾蕭梢朔風起毛為綠縹兩耳黃眼有紫焰雙
瞳光矯矯龍性合變化卓立天骨森開張伊昔太僕張
景順監牧攻駒閱清峻遂令大奴守天育別養驥子憐
神俊當時四十萬匹馬張公歎其材盡下故獨寫真傳
世人見之座右久更新年多物化空形影嗚呼健步何

由騁如今豈無驀裏與驂騑時無王良伯樂死即休

驄馬行

鄧公馬癖人共知初得花驄大苑種夙昔傳聞思一見
牽來左右神皆竦雄姿逸態何嶮崿顧影驕嘶自矜寵
隅目青瑩夾鏡懸肉駿礪礪連錢動朝來久試華軒下
未覺千金滿高價赤汗微生白雪毛銀鞍却覆香羅帕
卿家舊賜公取之天廐真龍此其亞畫洗須騰涇渭深
朝趨可刷幽并夜吾聞良驥老始成此馬數年人更驚

豈有四蹄疾於鳥不與八駿俱先鳴時俗造次那得致
雲霧晦冥方降精近聞下詔喧都邑肯使騏驎地上行
醉為馬墜諸公携酒相看

一首見俊快奔突之勝

甫也諸侯老賓客罷酒酣歌拓金戟騎馬忽憶少年時
散蹄迸落瞿塘石白帝城門水雲外低身直下八千尺
粉堞電轉紫遊韁東得平岡出天壁江樹野堂爭入眼
垂鞭躡蹀凌紫陌向來皓首驚萬人自倚紅顏能騎射

安知決臆追風足朱汗駉驛猶噴玉不虞一蹶終損傷
人生快意多所辱職當憂戚伏衾枕況乃遲暮加煩促
朋知來問腆我顏杖藜強起依僮僕語盡還成開口笑
提攜別掃清溪曲酒肉如山又一時初筵哀絲動豪竹
共指西日不相貸喧呼且覆杯中淥何必走馬來為問
君不見嵇康養生被殺戮

竹莊詩話卷十四